

PETROVA

Kad bi pasal lipanj
i petrovsko sunce pripeklo
saveti smo prijimali mi dica
da nas oće zgodit sunčanica
od velike sparini
prišvidale su matere i strini
a mi smo za dešpet po suncu
naganjali čvrčki i kobilani
i tako šundrevali dani.

Onda j prišla Petrova
ringišpilj, krami, sajam,
radost nova!
A mi dičina s razbijenimi koleni
palci i nosi
tekli po Vrbi bosi,
potezali oca da kupi
petešića ča zada sope
i bebice
ke se va ustih tope.

To j bil jedini dan
va leti
ta Petar i Paval sveti
kad smo mi dičina
dobili dan na volju
kakovu maneštru bolju
a letno bi sunce žeglo
i tugu nan z srca steglo.